



Pakistan security force-i Afghan arrtsü nung telungpur 29 tepsetogo

Ben Stokes international cricket asaya nungi anisüngzüker



VOL. XXIII ISSUE NO. 257 (ADOK 257) DIMAPUR SANGTENNÜ (TUESDAY) AAMI (JUNE) 30, 2026

₹ 5.00

Mkg nung youth awareness rally & wellness sentong agitsü

Dimapur, June 29, 2026 (TYO): World No Drug Day 2026 tenüng nung June 30 nü Mokokchung nung lanur sentong tulu ka ayongzüka agitsü.

Iba youth awareness rally & wellness programme ya Rajyoga Education & Research Foundation (RERF) ajanga ayongzüker. RERF ya Brahma Kumaris indang kongsang ka lir aser parnoki 12 Assam Rifles, Mokokchung den yaritepa iba sentong agitsü.

"Drug Abuse Prevention & Value-based Living" omen nung ajemdaker anepdang 10:00 ako nung Assam Rifles Ground, Mokokchung nung sentong tenzüksü.

Iba sentong nung Mokokchung Deputy Commissioner Ajit Kumar

Verma, IAS tongti tesemdanger asütsü aser New Delhi nungi senior neurologist & narcotics specialist Dr. Swapan Gupta-i o jembitsü.

Iba sentong agiba sülen Assam Rifles Ground nungi awareness rally tenzüksü aser shilem agirtemi Mokokchungjila tiyongtsü ajanga jajar Mokokchung Town Ao Baptist Arogo anasa Police Point nung adenshitsu.

Iba rally ajanga substance abuse anema osang sangoktsüba den nübortem dang healthy, value-based lifestyles ajungmesotsü.

Iba sentong nung kaketshirtem, lanur teloktem aser press densema public ajak arua adentsü tayongertemi pelashishia jaokogo.

CBSE-i three-language policy meyipa reprangshir

New Delhi, June 29, 2026 (Agencies): Central Board of Secondary Education (CBSE)-i Hombarnü three-language policy meyipa reprangshiogo.

Tang foreign languages agia Class 7, 8 aser 9 nung azüngba kaketshir nem one-time relaxation agütsütsü CBSE-i lemtetogo.

Tang meyipa reprangshiba sülen kaketshirtemi tang tezüngdak foreign language combination den native Indian language (Bharatiya Bhasha) ka bendenloksü. Iba third language ya school temi asadangtsü aser kaketshirtem Class 10 azüngdang CBSE board examination nung iba subject magitsü.

CBSE-i taküm May ita sangdong ka agütsüba nung Class 9 kaketshirtemi three-

language policy benshitsu aser iba nungi oshi asem nungi oshi anabo Indian languages asütsüla ta shia liasü. Iba sangdong atema tsüraburtemi tebilemtü lemsatepa liasü aser French, German, Japanese o Spanish azüngba kaketshir tsüraburtemi academic session tom nung oshi melenshiba anema lungkak ait.

Union Education Minister Dharmendra Pradhan-i taoba hopta Class 7, 8 aser 9 nung foreign languages azüngba kaketshirtemi maneni item languages züngdaksütsü ta shia liasü.

2026-27 academic session nung Class 10 nung azüngertemi two-language system kübok maneni azüngtsü aser third language mazüngtsü ta CBSE-i tanü jangjatsüogo.

July 1 nungi petrol & diesel tenokdangba agientsü

New Delhi, June 29, 2026 (Agencies): Centre sorkari July 1, 2026 nungi petrol aser diesel ayokba nung tenokdangba kar agüja aliba agientsü.

US-Israel-i Iran den raraba aser Strait of Hormuz shibangba ajanga Centre sorkari tan ita tetenzüklen totzü ayokba dak sendakba nung tenokdangba kar agüja liasü.

Centre-i supply metokmeperi adoktsü akok ta bilema commercial consumers dang retail fuel stations nungi petrol o diesel aliba noktanga liasü.

Centre-i June 12 nü tenokdangbatem agütsü saka retail petrol aser diesel jenjangtem melenshi. Iba ajanga retail aser bulk rates balaka aküm aser industrial, commercial o institutional consumers-i retail outlets nungi totzü alizük.

Iba tensa azüoktsü atema Centre-i commercial aser institutional consumers dang retail fuel stations ajanga masü saka designated consumer pumps nungi dang totzü alizüktsü tetuyuba agütsü. Centre-isa retail outlets nung customer shia mesüra anogoshia gari ka atema 200 litres dang ayoktsü telatetba agütsü.

Centre-i domestic supply tensa asadangba sülen Bodbar nungi tenokdangbatem agientsü lemtetogo.

Centre-isa taoba hopta commercial LPG supplies akhi ama kümtsüogo.

US aser Israel ajanga rara tenzükbä ajanga global energy supply chains nung kongshi aser iba jagi taküm March ita nungi temporary restrictions agütsüba agiener ta Centre-i metetdaksü.

SoO camps nungi ozüing alema inyaksangshir: Manipur NPF President

Imphal, June 29, 2026 (Agencies): Suspension of Operations (SoO) agreement kübok aliba designated camps ya ozüing alema inyakdak aser kin o kin mepetmesü adokdaksüba tesemtem kümogo ta Naga People's Front (NPF) Manipur State Unit President Awangbow Newmai-i ashi.

Item designated camps nungi ozüing alema inyaksangshiba kulitem peria dang lir ta pai ashi.

SoO framework kübok lapokba camps aika nung ozüing alema inyaksangshir aser iba indang kulitem peria dang lir ta Newmai-i ashi.

Manipur nung BJP-i aniba teloktep sorkar nung NPF dena lir aser SoO arrangement atema

ashishitep ken o adoka jembiba mapang Newmai-i iba ya shiogo.

India sorkar (Union Ministry of Home Affairs), Manipur sorkar aser Kuki-Zo telungpur teloktem tsüngda August 2008 nung SoO agreement nung sign sütepa liasü. Iba ya rara anentsü aser yimtenren olemtep tenzüka aotsü nükjiding nung nangzüktep ajisüaka February 2024 nung state sorkari SoO nung madentsü lemteta liasü.

"SoO agreement ya sign mesütep asübo aser telungpur teloktem designated camps nung mayu asübo Manipur nung tang ajurua aliba tensa ya paitoktetla. Congress party-ia iba ya shitak-

a ta shitettsüla" ta Newmai-i ashi.

Newmai-isa Naga nunger trok pur oa tepsetba indang jembidang "Kuki nunger 14 chiokdang Kuki National Front (Presidential) spokesperson Aaron Kipgen-i nisung pur aoba nung shilem agiba indang shia liasü. Külen Kuki-Zo Council-ia Kuki telungpurtemi civilian tem tepsetba tenüng agiogo aser sasaba shiogo" ta ashi.

"Sasaa bilemba agi tai maket nisungtem tepsetba atema memetener aser iba mapa inyakertem pua merenshitsu. NPF-i ozüing alema inyaksangshiba, nisung tepsetba mesüra tashiyim agi civilian tem pua ayuba pusema menungiter" ta Newmai-isa shisem.

YWO-i Reny Wilfred indang ken o tembangdaksünür

Dimapur, June 29, 2026 (TYO): Yimkhiung Women's Organisation (YWO), Shamator headquarters-i Commissioner of Nagaland dang IAS ketdangsür Reny Wilfred anema ken o benoka aliba tekaratiba nung tembangtsü atema shidi ka zülüogo.

YWO-i Shamator Deputy Commissioner ajanga züluba shidi nung okadak iba ken o angadanga aruba nung mapang atsülangba atema tebilemtü abenba shia lir.

Reny Wilfred anema benoka aliba ken ken o tem ya tetsürtem

dak tim mesüi kongshiba indang lir aser mezüng Noklak Police Station nung agütsüba sülen State Crime Police Station, Kohima nung tanaben agütsüshi ta YWO-i ashi.

Ken o tulu süaka mapang talangka agir aser tai tonglokja alisang talenba kecha melii alir aser takoksa ajururtemi temeten angutsü atar ta YWO-isa ashi.

Mapang talangka ka agiba ajanga takoksa ajururtemi ozüingren nung tamang makai akümtsü aser parnok tekolok nung timtemba den lokti nung bendanga amshir. Külen, ken o

talangka atsülangba ajanga tai tonglokja aliri kulisertem amokmerentsü aser kulitem agientsü mapa inyaksü akok ta YWO-isa metetdaksüogo.

Tetsürtem anema tim masüba inyakba ya ken o tulu lir aser mapang shitak nung temeten magütsüba ajanga public-i justice delivery system nung tamang makai akümer aser aibelenertem temulung tali uludaksür. Anungji Commissioner of Nagaland-i iba khuret angateta ozüing dak sendakba maparen tekaraba nung inyaka aotsü ayongzüker ta YWO-isa ashi.

P. Paiwang Konyak-i 16 buba H&FW mungdang nung aden



Dimapur, June 19, 2026 (TYO): Nagaland Health & Family Welfare Minister P. Paiwang Konyak-i June 29, 2026 nü New Delhi nung 16 buba Conference of the Central Council of Health & Family Welfare nung denogo.

Iba mungdang nung Union Minister for Health & Family J. P Nadda-i shilem agi aser state o union territory balala nungi Minister tem aden.

"Prime Minister Narendra Modi aser Union Minister J. P. Nadda nati anir Centre sorkari

Nagaland nung healthcare services tashi itdaksütsü atema maneni nungita yariba atema pelar" ta Paiwang-i o jembidang ashi.

Paisa Nagaland nung primary, secondary aser tertiary levels nung health infrastructure tejen ajungkettsü atema Centre nungi teyari teimba agütsütsü atema ashi.

Nagaland nungi mezüingbuba MBBS graduates batch 2028 nung renemtsü ta pai ashi.

Tenem aser meta talang pilar aliba state tem nung

Centrally Sponsored Schemes kübok region-specific costing mapa tenzüknung ajungtsü. Ano, NHM resource allocation formula nunga ali, meta pilaba, nütsüng yongsük prokshia aliba aser minimum cost nung ajemdaker teyari agütsütsüla ta Minister Paiwang-isa ashi.

Paisa Union Minister J. P. Nadda dang cooperative federalism aser equitable development tangatetba nung onüktem agizüka mapa inyaksü mepishi.

Dimapur nung Census Awareness sentong ayongzüük



Dimapur nung Census Awareness sentong aliba mapang tangokba noksa angur.

Dimapur, Aami/June 29 (TYO): Census exercise atema renemshia aser nūburtem nem awareness tajungba agūja amalitep akatsü atema Gaon Buras aser Master Trainers den Census Awareness and Sensitisation Meeting ka June 29, 2026 nü Deputy Commissioner, Dimapur indang Conference Hall nung ayongzüika liasü.

Iba senden nung Wiridin, NCS, SDO (Civil), Dimapur and Charge Officer ajanga jembidang, Census dak sendakba nung olulu mesüra osang tiaziü nem manishidaktsütsü ayongzüük.

Enumerators aser Supervisors tem training teperi agiogo aser iba mapa inyaksü renema lir, ta pai ashi. Pai House Listing Operation rateta jembidang, nisung aliba süang mesüra tazüing aliba süang, structure ajak number agütsütsü aser züluoktsü aser Enumerators temi tasüngdangba 34 aliba mobile application ka amshia osang bendentsü ta ashi.

Household enumeration ya Census indang tongtoret lir, anungji nūburtemi osang shidak aser ochi agütsütsüla, ta Wiridin i ayongzüük.

Pai Gain Buras tem dang kilen züingdangba mapang Enumerators den yariteptsü asoshi lanur volunteers shimtsü ayongzüük aser yimtsüing telungzüük jangjaba aser enumeration block boundaries nung yariteptsü ashi.

Supervisor shiai Enumerators trok den yariteptsü, anungji field visits mapang yimtsüing ketdangsür aser nūburtemi Census team en yariteptsüla, ta pai ashi.

Census information ya khenyongi temai madoktsüla aser temai adoktsüra, ozüing agi melaba ama merenshitsu, ta ashi aser senden nung shilem agirtem dang pei aliba yimtsüingtem nung awareness agüja nūburtem dang Census team den amalitep akatsü asoshi ajungmesotsü ayongzüük.

House Listing Operation ya Census 2027 exercise nung mezüing noklem lir, ta EAC Dimapur, Khiuzan Kaurinta-i metetdaksü.

Dimapur ya Census Charge areas asem lir aser itemji Dimapur Municipal Council (DMC), East Dimapur Town Council (EDTC) aser Dimapur Sadar, ta lai ashi.

Iba senden nung Dimapur Sadar kübok yimtsüing 34 nungi Gaon Buras, Village Council representatives, Supervisors aser Master trainers tem dena liasü.

Enumerators temi July 1 nungi 30, 2026 tashi kibong shia dangi arutsü, anungji arogo, yimtsüing nung aliba lokti tentet aser nūburtem dena awareness senden ayongzüknung ajungtsü, ta Kaurinta-i ashi.

Lai kilen kata mezüdoktsü aser mawajemba kibong tem jangjaba nung yariteptsü aser arütsü dak sendakba mangatettep nung yariteptsü ajungshia liasü.

UNWIYC 2026 nung NU nungi Repakaba Tzudir-i shilem agi



Dimapur, Aami/June 29 (TYO): Youth Federation of Indigenous Nationalities (YFIN), Nepal aser National Youth Council (NYC), Nepal lungjemer "Our Roots, Our Rights, Our Leadership: Collective Indigenous Movement for Self-Determination" omen kübok Kathmandu, Nepal nung United Nations World Indigenous Youth Conference 2026 ayongzüikba sentong nung Nagaland University, Lumami nung Department of Sociology nungi research scholar Repakaba Tzudir-i university tenüing nung shilem agia liasü, kong Asia tesem balala nungi lisopur lanur lenirtem, activists, academics aser community representatives

150 jungnüa dena liasü.

Repakaba ya International Delegate aser Indigenous Scholar ama Bangladesh, Myanmar, Nepal aser India tesem balala nungi shilem agirtem den külemi aden.

Pa ya "Indigenous Youth Movement in Asia" indang session nung Panel speaker ka ama shilem agia Naga lanur temi talisa mapa manguba tebilemstsü ajangshibatem, lokti-rongsenketzüing agi lisopur tebilemstsü aser tejangraba tuluba nembanga ayuba amala nung pa tangatetba lemsatep.

"Linük aser sobaliba balala nungi adenshiaka tajangshiba nung kanga junga sendaktepa aliba jangjatetba ya iba mungdang nung adenba

mamashitsu ka liasü. Kin ajak puti otsü aser mulungsentsü balala liaka, ajaki tebilembsa kasa, asen ayak wazüka ayutsü, asen li aser sobaliba kumzüka ayutsü aser lanurtem atema maongka agütsütsü indang jembia liasü," ta pai ashi.

Lisopur lanur temi pei sobaliba wazüka ayuba aser kanga kera melenshia ainba lima den lirumedema litetba indang jembiba ajanga asenok kisüing tim atemer masü aser arütsü alema oa kati ka dak nungi angazükba nung tashi lir ta angatet, ta Repakaba-i ashi.

"Mapa manguba tebilemstsü, migration, shisaluyim kanga atakteta aliba aser takum liyonga aotsü maongka peria maliba, lisopur oshi aser shisatsü samaa aoba amala tebilemstsü aiben jembia liasü," ta pai ashi.

Nagaland nung mapa manguba ya lanur aika asoshi tebilemstsü tulutiba kumdaktsür, anungji item dang tuluba lisopur tebilemstsü aser temeden atema jembitsü tasak akumer, ta pai ashi.

Anogo ana mungdang ya June 13-14, 2026 anogotem agia liasü aser iba mapang lisopur lanur lenirtem, scholars, activists aser Asia nung kin balala nungi teshimtet nisungtem ajurutepe shisatsü lemsatepa sensaksema liasü.

Iba mungdang nung shilem agirtem nem Indigenous Peoples of Asia Solidarity Fund (IPAS Fund) aser Youth Federation of Indigenous Nationalities (YFIN), Nepal ajanga yaritepa liasü.

Dimapur nung nisung tasü mang kanguteta lir

Dimapur, Aami/June 29 (TYO): Dimapur Police ajanga June 29, 2026 sangdong ka nung, Master Colony, Naharbari, Dimapur nung tetsür ka tasü nguteta lir ta June 28, 2026 anepdang 10:30 ako meta East Police Station nungi telephone ajanga osang ka Women Police Station, Dimapur dangi arua liasü, ta ashi.

Osang aruba sülen duty nung alirtem iba tesemi bushisüingdangtsü atema ao. Asür ya arishi küm 28 tain Roshni D/o Fazar Ali of Kandhulimari, PO/PS Juria, District Nagaon, Assam aser tang Master Colony, Naharbari, Ward-10, Lane-1, Dimapur nung alir ta jangjatetogo. Ozüing agi melaba maparen ajak renema inyakba sülen tasü mang ya PM examination atema District Hospital Dimapur nung bener oa lir.

Ano maneni bushisüingdangba mapang iba tetsürlar jala ana aser tenu teburchanu ka kidang nungi samar liasü ta ngutet. Osang

tejangja nung ajemdaker bushisüingdang temi tanurtem ya Diphupar B Village, 5th Mile Chümoukedima nung ngutet.

Iba sülen tanur asem ya kumzüka medical examinations shidak agir Childline nem agütsüogo aser iba osang CWC nem ozüing agi melaba ama agütsüogo, ta Dimapur Police ajanga ashi.

Iba mapang temulung melemteti Master Colony, Naharbari, Ward-10, Lane-1 nung telidak arishi küm 27 tain Salim Ali (S/o Lt. Intaz Ali of Kandhulimari, PO/PS Juria, District Nagaon, Assam) pua asüingdangyatsü atema police station-i anir aru.

Bushisüingdangba mapang kuli bendenba nung ajemdaker tai tonglokja alisang Salim Ali ya tetsürla tepsetba aser tim masüba mapa inyakba dak sendakba nung apu, shiba asür Roshni kinunger lir.

Women Police Station, Dimapur nung iba ken o benoka bushisüingdangba mapang lir, ta Dimapur Police ajangasa metetdaksü.

EDTC ajanga MRP alema oset mayoktsü metetdaksür

Dimapur, Aami/June 29 (TYO): East Dimapur Town Council kübok amenoka aliba business establishments ajunga dang Maximum Retail Price (MRP) alema oset ayoktsü aser mapang liwar aliba oset bendentsü mesüra ayoktsü khenyongi memelar, ta Rate Control & Quality Maintenance, East Dimapur Town Council (EDTC) ajanga sangdong ka nung metetdaksü.

Dokan kibur, shishilempar, wholesalers, retailers aser tanga business establishments ajunga dang jenjang atetba aser oset mapang liwaba dak sendakba nung ozüing yanglua aliba shidak amshitsu

metetdaksür.

Rate Control & Quality Maintenance ajanga EDTC jurisdiction kübok mapang shia inspections alitsü. Kija mesüra business establishment kari MRP tang temaba sen meshiba mesüra mapang liwar aliba oset ayokba metetra, temerenshi agütsüba aser senchi achiba densema ozüing agi mela aliba ama merenshitsu.

Consumer rights kumzüka ayutsü aser nūburtemi aginüba ama shishilempaba yimya shidak amshitsu mechi business establishments ajungai amalitep akatsü ayongzüker, ta East Dimapur Town Council sangdong ajangasa ashi.

ANCSU-i Tetso College nem tenüngsang agütsü



Dimapur, Aami/June 29 (TYO): India Today & MDRA Best Colleges Survey 2026 nung Top Bachelor of Arts Colleges in India 2026 rongnung Tetso College-i takok tajung nguteta 198th Rank tongtetba atema tenüngsang agütsür, ta All Nagaland College Students' Union (ANCSU)-i sangdong ka nung ashi.

Linük nung iba ama jenjang tongtetba ya reju-i academic excellence, quality education, mangdang tajung yur aniba lenirtem aser tesayur, staff aser kaketshir temi bendanga agütsür inyakba kuli lir.

Colleges 45,000 dak tema nungi India's Top 200 colleges nung züingsemba ya Tetso College atema tongtipang

alizüing ka tongtetba kisüing masü saka Nagaland state ajunga atema tejak tentetba maparen ka lir, koba ajanga asen region nung higher education ainba aser teimla tajung aliba sayur, ta ANCSU-i ashi.

Tetso College-i teti academic innovation, kaketshir rangben terenlok aser reju ajungba tsütsü tatishitsu tajung sayutetba aoshi tenüngsang agütsür. Iba ama takok yagi kaketshir temulung ajungmesor aser Nagaland nungia linük jenjang nung tokteptsü teimla aliba jangjatsür, ta ashi.

Ano tarutsü nung takok tuluba angutsü asoshi iba yagi animesotsü onoki tamang akar, ta ANCSU ajangasa ashi.



June 29, 2026 nü Seychelles nüchiso anguba sülen küm 50 ajungba National Day sentong nung Indian Navy aser Assam Rifles sepaitemi shilem agidang tangokba noksa nung angur. Kasa noksa nung Ato kilonser, Narendra Modi-a angur.

Tenla auyaba ken o nung tai tonglokja alirtem atema ken o mejembitsütsü

New Delhi, Aami/June 29 (Agencies): Hombarnü Faizabad Bar Association-i Ayodhya nung Ram tekülem ki tenla auyaba ken o nung tai tongloka alirtem asoshi ken o mejembitsütsü telemtetba agiogo, aser kari dangi parnok pusema ken o jembitsüra senchi lakh 5 achitsü.

Lawyer temisa Shri Ram Janmabhoomi Trust general secretary menden toktsüsang, Champat Rai den Anil Mishra aser Gopal Rao nunger dang anogo asemnü tsüngda Ayodhya toktsür oadokang, ta tuyuogo.

Parnoki anogo asemnü tsüngda Ayodhya toktsür moura lawyer temi yimti tesem ajak mokdangtsü, ta metetdaktsü.

Ram tekülem ki tenla auyaba ken o dak sendakba nung Champat Rai aser Mishra natibo tena sasa Trust nungi anenogo.

Iba ken o ya Uttar Pradesh state sorkari tentetba Special Investigation Team (SIT)-i bushisüngdangdar. Tang tashi

nung police-i nisung 8 puogo aser Rai dang asüngdangyaogo.

Bar Association-isa Arrla 156(3) nung ajemdaker Rai, Mishra aser Rao nunger anema court nung ken o benoktsü. Bar Association-isa iba ken o ya Central Bureau of Investigation (CBI) nem agütsütsüla ta akhanger.

Osangbener den jembidang Bar Association Tir, Kalika Prasad Mishra-i, "Item nisungtem- Champat Rai, Gopal Rao aser Anil Mishra nungeri memeteti iba ama ochimashi tulu mataloktsü," ta metetdaktsü.

Taoba mapang nunga (2005 küm) Ram mandir amakba ken o nung tai tonglokja alirtem atema ken o mejembitsütsü Faizabad Bar Association-i telemtetba agia lasü.

Champat Rai, Anil Mishra aser Gopal Rao nunger ya Ram tekülem ki ketdangsubaren nung densema lir, ajisüaka FIR nungbo par asemprong tenüng mali.

Ram tekülem ki tenla auyaba ken o nung tai tonglokja FIR nung aliba nisung tiji - Avinash Shukla, Anukalp Mishra, Lav Kush Mishra, Manish Kumar Yadav, Karunesh Pandey, Ram Shankar Mishra, Subhash Srivastava aser Tinnu Yadav ta ajasang Ramashankar nunger lir. Ram tekülem ki tenla azüngba aser sentioset tenla bendenba nung parnoki shilem agia lasü.

Ano osang angazükba agi, tai tonglokja alirtem itasenji 12,000 dang ajisüaka parnok rongnung nisung katibo sen lakh 25 shi jenjang kiojen süa lir.

Bar Association Tir Mishra-i, "Association nungi advocate shingaia tai tonglokja alirtem atema ken o mejembitsütsü. Lawyer kati danga ken o jembitsünüra mezüngbuba nung application ka agütsüba den külemi Bar Association nem sen lakh 5 agütsütsüla. Iba senji iba ken o nung tai tonglokja alirtem anema jembiba nung amshitsü," ta metetdaktsü.

Khamenei asüpila sentong nung Bihar Angh aser MEA MoS na adentsü

New Delhi, June 29 (Agencies): Taoba mapang Iran nung tongti lenir, Ayatollah Ali Khamenei asüpila sentong nung adentsü atema Ato kilonser, Narendra Modi jaok, ajisüaka India sorkari iba sentong nung adentsü atema Minister of State for External Affairs, Pabitra Margherita aser Bihar Angh, Lt Gen (Retd) Syed Ata Hasnain na yoktsü.

Anogo ishika tejaklen Iran Tir, Masoud Pezeshkian-i iba sentong nung adentsü atema Ato kilonser Modi jaoka lasü.

Khamenei ya taküm February 28 nü US aser Israel nati senteper amakdang tepseta lasü. Khamenei-i küm 36 tashi Islamic Republic of Iran yimsüsüa aruogo.

Asüpila sentongji July 4 nungi July 9 tashi agitsü aser tatemsa Khamenei asoba yimti, Mashhad nung tasü mang aremtsü.

Iran yimtiba, Tehran kübok temeshi tesem Qom nung July

7 nü mezüng sentong ka agitsü, iba sülen sentong aika agiba sülen tatemsa July 9 nü mang aremtsü.

Tehran, Mashhad aser Qom yimtitem nung agiba sentong nung nisung million 20-i mangyimtsüa akok, ta ketdangsertemi metetdaktsü.

1989 küm Ayatollah Ruhollah Khomeini asüpila sentong nunga mangyimer nisung million 10 lasü. Pa ya Islamic Republic of Iran tentetsang lasü.

Khamenei asüpila sentong nung Pakistan tongti lenir Shehbaz Sharif densema linük balala nungi lenirtem adentsü. Tang tashi nung Azerbaijan, Afghanistan, Russia, China, Syria aser Lebanon nungi lenirtem iba sentong nung adentsü jangaogo.

Khamenei asüpila sentong ya March ita nung agitsü lasü, ajisüaka West Asia nung raraba tensa mesüngjemba ajanga mapang talangka atsülanga aruogo.

Modi-i aniba cabinet asetshitsü; Dharmendra Pradhan anentsütsüa akok

New Delhi, June 29 (Agencies): Tzüngluruwa mongpu Parliament senden metenzükdang Ato kilonser, Narendra Modi-i aniba cabinet asetshitsüa akok aser iba mapang nungji Union Education Minister, Dharmendra Pradhan menden nungi anentsütsüa akok.

BJP Tir Nitin Nabin kübok BJP team tasen ka sangdongba

den külemi Union Council of Ministers asetshitsü, ta osang ka ajanga metetdaktsü.

Kobi melii "Team Nitin Nabin" sangdongtsü aser team tasenba nungji lanurtem aika densema alitsü, ta kasa osang ajanga metetdaktsü.

Tang teinyakdak Union minister tem kar BJP organisation nung shimtsü aser party office ketdangpurtem kar Modi-i aniba ministry nung shimoktsü.

NEET paper leak asüba sülen kaketshirtem aikati education minister Dharmendra Pradhan menden nungi anentsütsüla ta takhangba agütsüdar, aser iba dak sendakba nung pa menden nungi anentsütsüa akok.

Taküm tzüngluruwa mongpu Parliament senden July ita hopta tasembuba nung tenzüktsü, aser ibaji masü dang cabinet asetshitsüa akok.

Ato kilonser Narendra Modi-i June 27 nungi 29 tashi Seychelles semdangba sülen Hombarnü meyipa aruogo. Pai July 6 nungi July 11 tsüngda Indonesia, Australia aser New Zealand semdangtsüa akok, anungji iba sülenji ang cabinet asetshitsüa akok.

Union Minister ana- Pankaj Chaudhary aser Harsh Malhotra na nembo Uttar Pradesh aser Delhi na nung party unit lenitsü atema lezmüktsüogo, anungji tenata cabinet nungi agientsüa akok.

Uttar Pradesh, Uttarakhand aser Punjab nungi aika Modi ministry nung anioktsüa akok, kechiyong sangküm state asem nungji assembly elections agitsü lir.

Ano külen taküm BJP-i West Bengal assembly election nung takok tulu anguba nung ajemdaker state nungi MP karbo Union Ministry nung anioktsüa akok.



ਪੰਜਾਬ ਨੈਸ਼ਨਲ ਬੈਂਕ

punjab national bank

...भरोसे का प्रतीक !

...the name you can BANK upon !

SALE NOTICE

FOR SALE OF

MOVABLE / IMMOVABLE PROPERTIES

Circle Office: Imphal ARMB, Kwakeithel Thokchom Leikai, Imphal, E-mail: cs946700@pnb.co.in

E-Auction Sale Notice for Sale of Immovable Assets under the Securitization and Reconstruction of Financial Assets and Enforcement of Security Interest Act, 2002 read with provision to Rule 8 (6) of the Security Interest (Enforcement) Rules, 2002. Notice is hereby given to the public in general and in particular to the Borrower (s) and Guarantor (s) that the below described immovable property mortgaged/charged to the Secured Creditor, the constructive/physical/ symbolic possession of which has been taken by the Authorized Officer of the Bank/ Secured Creditor, will be sold on "As is where is", "As is what is", "As is what is", and "Whatever there is" on the date as mentioned in the table herein below, for recovery of its dues due to the Bank/ Secured Creditor from the respective borrower (s) and guarantor (s). The reserve price and the earnest money deposit will be as mentioned in the table below against the respective properties.

SCHEDULE OF THE SECURED ASSETS

Lot No.	Name of the Branch	Description of the Immovable Properties Mortgaged/ Owner's Name (mortgagers of property(ies)	A. Dt. Of Demand Notice u/s 13(2) of SARFESI ACT 2002 B. Outstanding Amount C. Possession Date u/s 13(4) of SARFESI ACT 2002 D. D) Nature of Possession Symbolic /Physical / Constructive	A) Reserve Price (Rs. in Lacs)	Date/ Time of E-Auction	Details of the encumbrance s known to the secured creditors
	Name of the Account:			B) EMD (last date of deposit of EMD)		
	Name & addresses of the Borrower / Guarantor Account :			C) Bid Increase Amount		
1	PNB - 104120-KOHIMA	All part & parcel of residential property along with structure thereon owned by Mr. Alhou Kesiezie s/o Keduosievie Kesiezie, measuring 2500 Sq ft covered, Plot No. 3179, Patta No. 4396 (New) Situated at L-Khel Kohima Village, Dist. Kohima, Nagaland with bounded thereon: - On the North-Stream, On the South-Govt Land, On the East-Plot of Sri Alhou, On the west-Govt Land.	A) 06-08-2025 B) 60641465.25 further interest thereon C) 13-11-2025 D) Symbolic Possession	A) Rs. 68.00 Lakhs B) Rs. 17.00 Lakhs C) Rs. 0.20 Lakhs	Date: 17.07.2026 Time: From 11:00 AM to 04:00 PM	NIL
	PNB - 104120-KOHIMA	All part and parcel of residential property along with structure there on owned by Mr Alhou kesiezie(Angami) S/o-Shri Keduosievie Kesiezie, measuring 1440 Sq ft covered, Plot No. 224, Patta No-4231 (New)/258(Old), Situated at L-Khel Kohima Village, Dist-Kohima, Nagaland with bounded there on :-On the North-NAPO Building, On the South-Footpath, On the East-Plot of Sri Neizekuo, On the west:-NH-61	A) 06-08-2025 B) 60641465.25 further interest thereon C) 13-11-2025 D) Symbolic Possession	A) Rs. 99.00 Lakhs B) Rs. 25.00 Lakhs C) Rs. 0.20 Lakhs		
	PNB - 104120-KOHIMA	All that part and parcel of residential property along with structure there on owned by Mr Alhou kesiezie s/o Shri Keduosievie Kesiezie, measuring 6875 sq ft covered Dag No-618, Patta No. 336, Block No. Purana Bazar, Dist. Dimapur, Nagaland with bounded thereon: -On the North: Land of TC Akumba Ao, On the South: Land of Mrs Lhoutuo Angami, On the East: NH-39, On the west:-Land of L Lhoutuo	A) 06-08-2025 B) 60641465.25 further interest thereon C) 13-11-2025 D) Symbolic Possession	A) Rs. 73.00 Lakhs B) Rs. 18.40 Lakhs C) Rs. 0.20 Lakhs		
	PNB - 104120-KOHIMA	All part and parcel of property with structure thereon owned by Mr. Alhou Kesiezie s/o Mr. Keduosievie Kesiezie, measuring an area of 118544 sq. ft. covered by Permit no. 486/05 dated 25/06/2005, Sector C Diphupar village at Dimapur, Nagaland-797115, butted and bounded by North: Village Road, South: Plot of Shri Zaviile Angami, East: Plot of Alhou and Rongsen Wati, West: Main Road.	A) 06-08-2025 B) 60641465.25 further interest thereon C) 13-11-2025 D) Symbolic Possession	A) Rs. 202.00 Lakhs B) Rs. 51.40 Lakhs C) Rs. 0.20 Lakhs		
	PNB - 104120-KOHIMA	All part and parcel of property with structure thereon owned by Mr. Alhou Kesiezie s/o Mr. Keduosievie Kesiezie, measuring an area of 37220 sq. ft. covered by Permit no. 562/05 dated 27/06/2005, Sector C Diphupar village at Dimapur, Nagaland-797115, butted and bounded by North: Plots of Shri Sashi & Yantsumong, South: Plot of I Wati & R Wati, East: Sector Road, West: Plot of Shri Alhou	A) 06-08-2025 B) 60641465.25 further interest thereon C) 13-11-2025 D) Symbolic Possession	A) Rs. 202.00 Lakhs B) Rs. 51.40 Lakhs C) Rs. 0.20 Lakhs		

TERMS AND CONDITIONS

The sale shall be subject to the Terms & Conditions prescribed in the Security Interest (Enforcement) Rules 2002 and to the following further conditions

1. The properties are being sold on "AS IS WHERE IS BASIS" and "AS IS WHAT IS BASIS" and "WHATEVER THERE IS BASIS"

2. The particulars of Secured Assets specified in the Schedule hereinabove have been stated to the best of the information of the Authorized Officer, but the Authorized Officer shall not be answerable for any error, misstatement or omission in this proclamation.

3. The Sale will be done by the undersigned through e-auction platform provided at the Website <https://baanknet.com> on 17.07.2026 as mentioned above from 10:00 AM to 04:00 PM.

4. For detailed term and conditions of the sale, please refer <https://baanknet.com>

Date : 26.06.2026

Place : Imphal

Authorized Officer,

Punjab National Bank, Punjab National Bank



TIR YIMYIM YIMOBILEM (EDITORIAL)

DIMAPUR TUESDAY, JUNE (AAMI) 30, 2026

Shibai o shidang agütsütsü ?

Naga yimten nüchiso atema raraba tongpang kanga sashia aoba mapang ka, India sepaitemi Naga nungner yimtem rongdoktsü, alu raksatsü aser yim ana asem yim ka nung septepa yutsür reshikangshi aser tetsür-tebur balala pudena yur kangshiba tensa tia ka nung timtem aser takoksa maremtet, Naga nungner tazüng-temeteteremi o shidang agüja India kübok India nungersa alitsüsa Nagaland state aküm. Atangji, Naga nungertem temeten , taginüba aser tejangrabaji yimten nüchiso asünungji , reshikangshi timtem tulu liaka, Nagaland state akümba nungji Naga nungner yimten nüchiso asoshi raraba tongpang manentet, anungji ano Naga nungertem rongnung India nungner asütsü mulunger o memulunger na tsüngda meputepi aküm. Ajisüaka, Naga yimten nüchiso asoshi maneni raraba tongpang anema India-i anosa kanga sashia anema apuso nungji, ano Naga nungner yimten nüchiso asoshi rarartem rongnunga iba ama timtem metizükteti kari o shidang agüja 'Shillong Accord' renem. Naga yimten nüchiso asoshi raraba ken o nung ibaji tanabuba o shidang agütsüba liasü. Ajisüaka, iba jagia Naga yimten nüchiso asoshi raraba tongpang manen, kechiyong item o shidang agütsüba ken o ji yimten nüchiso jenjang nung alitsüba ken o masü saka India temzüng kübok alitsüba ken o liasü. Iba sülenbo, joko, Naga nungner yimten nüchiso tongpang nung maitsüi nokdaka alirtem rongnunga telemsa adok aser telok ka agi ana aküm. Ano, iba sülen Naga nüchiso bushir telok ana agi asem aküm, asem agi trok aküm, trok agi terana aküm aser terana agi metsür pezü aküm aser tanü tashi nunga Naga yimten nüchiso bushir telok tasen kümpet kümyonga aoba osang angashir. Aji oda, tangbo nüshiso bushir telokbo aika saka Naga yimten nüchiso tongpang ya anentsü atema shisa tasen ka bener arua o shidang agütsür-bo mali kümogo. Iba ama tensa tia ka nung telokang aika, anungji lenir aika kümogo. Item lenirtem rongnung kari Naga yimten nüchiso atema raraba tebilemtsü ken o tatembang küma latettsü atema India den onük kar benoka tangatettep ken o renembabo alimai angashiogo, saka o jagi mapa mekümtet Naga nungner akoksapet akoksadagi. Aji oda, India den renemba ken o bo matalok saka Naga nungnerbo telemsaang tali adok ta asüba ya tsürabur shin o nung Naga nungner asoshi " yar-a majishi aser sotsüa meyongshi" ta asüba to ataloker asütsü. Atangji, asenoki asenoksasa asenoki inyakba mapatem ya reprangdangra, tanü Naga nungner kar Delhi-i yimten nüchiso asoshi jembii aoer aser ano idangji Naga nungersa kar sen meshiloki aoer ta asüba meshimetsüba tia nung tanübo asenok rarar masü meshimetsür-ang kümer asenok o asenok na anogo shia aitsütepa angutsü. Ibaji tanü asen Naga yimten tia lir. Aji oda, tanübo Naga nungner ajak meshimetsür kümer Naga nungner yimkong asoshi yimten o ka shidanger mali kümogo. Ashiko, ibaji tsübuba agi asütsüa akok mesüra shisa agi matongba agi asütsüa akok. Ajisüaka, tang ya Naga nungner lenirtem asoshi ken o shidang tsübua alitsüba mapang masü mesüra kati ka aitsütepa alitsüba mapanga masü saka Naga yimten tebilemtsü ken o ya lendii adoka shisa lemsateper Naga nungner yimkong ajungtsü atema ken o shidangtsüba mapang lir. Atangji, asenoki Naga yimten tebilemtsü ken o ya Naga nungner ajaki akhümketa agizüktetba, honorable aser acceptable, jenjang ka nung latettsüla ta ola tulu agüja jembir, ajisüaka tanü Naga nungner ajaki agizüktetba yimten ken o bo India-i dang masü saka Tsüngremia magütsütettsü südi . Ibaji Naga nungertemi angatettsü junger. Aji oda, asenoki kechi aginür ta masü saka asenok asoshi tang ya kechi nüngdak ta asüba nung bilemdanger Naga nungner kintem nungi lenirtemi ken o shidangtsüla. Ibajiang nüchi ola asütsü.

OLEMSABANG

Ao agi "Tir" ya shir dang ajatsüla?

~ T. Meren Paul, Lower PR Hill, Kohima

Ao oshi renloka yanglushiba aser tim jayajoko jembiyim aser kaket züluba maparen taoba aso 20 puba nungi Ao Mungdang aser AKKOR ajanga inyaka aru. Tanü Aso 21 puba nung Ao Senden Literature Board ta tenüng jateter aruba tanübo joko Ao Riju ta tenüngji mapa den apet asüngteta jatetogo. Arangtet tatitang palala agia college nung graduate level dongogo, joko post graduate nung awaloktsü aser Ph. D. nung talak adongtsü nükla nung ajahayangba angashir aser reprangteter. Ni kala kenshi oshir ah masü, kaket zülur ah masü aser tahlangka azüngba nisung ah masü saka tila tanur asüandang nungi jungle o jembia aru aser school nung "aa, bee ta; aka, ana ta azüng anungji "a for apple" ya kechi dang ajar mesayu anungji mangazük. Mezüng lessonji "Ki ka, Kü ki ka, Ki kaka" ta aser tanapuba lessonji 'Pa ao, Ni ao" ta angazük. Otsüla oboula nungner mapang parnok amung süngkumshi kübok yimer ajak lereplerepa ali aser kibong shia ki kaka dang ka-a liasü, kibong kumerbo tsürapur den shinga semloka mali saka tetsür anioka kibong akumtsü asoshi teburi tamasa kiyim ki asütsü aser iba ki nungji alu ruhzüker külen tetsür anioka kibong akum. Yamaji nisung shia ki ka ka dang liasü aser aji oda lesson a practical nung yamaji sayu. Tanü ama Dimapur nung ki ka, Kohima nung ki ka, Mokokchung nung ki ka ta nisung ka ki aika akaba putu masü saka nisung shia ki kaka dang ka-a liasü.

Tekaklen shisemba amaji Ao oshi joko graduate level nung kaket adoka azüngtsü tenzükgogo anungji tangazüka tuluba aser temetetba tali renloktsü jenjang tasen nung ayaloka aoba ajeteter. Onok tanur asüandang yimdak tsürapurdemi (B.A) graduate dang class 14 passed asü ta (M.A) post graduate dang class 16 passed asü ta sa jaa liasü. Joko asenok ah Ao oshi nung class 14 jenjang dongogoni ta pelaa bilemer. Aji oda süaka dentsüng nung zülumen asüngteta mebentet lirh ta nibo tamalen ah züluogo aser anosa lephsia shiner. Asenoki junga mebendangtetba aser peintepa amshiba rongnung- 'b aser p', 'd aser t', 'o aser u', 'i aser y', 'g aser k', ibaibo tebang agi ola adoka dang rasatettsü saka züluba nung mesayutettsü anungji yangji doktsüdi saka tenüng amshiba aser jembiba kar indang bushidangdi.

Asen Ao oshi nung dang masü alima oshi talisa English nung ah tebur dang ajaba aser tetsür dang ajaba tenüng palala tebentet lir. Alima arakbanga kejai yimsüsüba menden tenüng King aser Queen ta tebur aser tetsür nüngja tebendang lir, tebur dang queen ta ajatsü makok aser tetsür dang king ta ajatsü makok. Saka Lokdi mulunga shimtetba yimsüsüba menden tuluba President ta süra tetsür aser tebur shir atahdir Mr. President, Madam President ta ajatsü. Senden nung menden (Chairman) tetsür mesüra tebur asütsüa akok anungji Mr. Chairman mesüra Madam Chairman ta dang ajar. Tanüasüng gender equality bushir demi Madam Chairwomen/Chairperson ta sa jembir saka aji "Robert's Rules of Order" of parliamentary procedures nungbo yamaji sayua mali. Alima dang Mother Earth ta ajar anungji alima indang jembidang aser züludang la (she) ta amshir saka pa ta mejimbir aser mezülur, yamaji oshioben dang tetsü oshi (mother tongue) ta ajar aser tebu oshi ta kecha nunga kodanga mamshir. Asenoki amangba Tsüngrem shiba dang Yehova Tsüngrem ta ajar ibaibo Tebu Tsüngrem (Father God) anungji Pa (He) ta laishiba nung jangja jangjaa shia lir. Asenoki amangba Christian yimsü nungbo tetsür tsüngrem indang laishiba nungji kecha sayua mali aser kotak tenyar ah tetsür mali ta angateter. Kodak nung Tsüngremi tetsür yanglua medoktsüba agi kodak tenyar shirnoki shi azü jangraba nem kokdaktsü parnoki alimai alua nisung jala den kiba lembua alima menentsüh anungji Noah densa alimai tzümetsüng yoka alima ajak shidoka meraktetba Lipok 7 nung zülua angur. Greek nungner otsü nungbo tetsür tsüngrem Diana indang shia lir, yamajij Hindu nungner ah tetsür tsüngrem ana Durga aser Lakshmi kulemer. Ao nung sülior, temezünger tanüla aketer nisung dak nungi ara tamajung sendoktsür tebur dang Arasentsür ta ajar aser tetsür dang Ongangla ta Chungleyimti nungi tenzüka jayonga aru, yamaji tetsür tebur tenüng songtet palala karh.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Evangelical Alliance-i Muslim nunger den osangtajung lemsateptsü ajungshir



John Ghanim

June 29, 2026: Evangelical Alliance-i UK tesem ajaklen Khristanem dang Muslim nungertem den Khrista osang tajung lemsateptsüla, ta ayongzük.

Evangelical Alliance-isa Muslim nunger kiyongertem aser külem mapa inyakterem den Khrista osang lemsateptsü atema maongka angudang metsübutsüla saka tasü itta osangtajung lemsateptsüla, ta metetdaksü.

Tawa UK nung "Islam: challenges, questions and gospel opportunities" ta ser webinar sentong ka nung UK nung Khristan nationalism aser Islam yimsü indang jembia liasü.

O jembirtem rongnung Solas Centre for Public Christianity nung Director aser Do Muslims and Christians Worship the Same God? kaket zülusang, Andy Bannister aser Yemen nunger Islam yimsü toktsür Khristan yimsü agizüker, John Ghanim na liasü.

Bannister-i, UK nung Islam yimsü ya kanga renlokdar, kechiyong parnoki yimtenren aser sobaliba nung ola adoka inyaker, ta ashi.

Tang UK nung Muslim nunger million 4 shi lir aser taruba küm ter tsüngda kanga renloksü ta asadangteter; ibaji Khristantemi sendoka meyutsütsüla, ta Bannister-i ashi.

"Islam yimsü amangertemi ola kanga adoker aser kanga tasü aitter," ta pai ashi.

Paisa Muslim nungertem rongnungi London Mayor Sadiq Khan nunger ama yimtenren nung lenirtem aika adokba ajanga Islam yimsü ainba kuli sayur, ta ashi.

Paisa, nisung aika, talisa lanurtemi tanela tsütsü tasüngdangbatem odiodia asüngdang aser iba ama mapang ka nung parnoki Islam yimsü densema tanga yimsü balala indang angatettsü meranger, ta ashi.

Webinar nungjisa Khristanem aikati Islam yimsü

dak sendakba nung o lemteptsü arendakba atema jembia liasü.

Bannister-i, atangji Khristantemi pei kiyongertem pelaa agizüker aser meimer, ajisüaka tanga yimsü amangertem den pei yimsü, sobaliba aser yimtenren indang lemsateptsü arendaker, ta ashi.

"Islam ya yimjak yimsü ka lir. Iba yimsü amangertemi parnoki kechi ochi ta bilemer ibaji odiodia lemsateper, ajisüaka asenokibo (Khristan) tera nüma metangteter," ta pai ashi.

"Muslim nunger medemertem aser kiyongertem den Khristan yimsü lemsateptsü atema Arogoi ajungshia meinyaker. Mosque nungbo Muslim nungertem dang Khristanem den Islam yimsü lemsateptsü atema ajungshir," ta pai metetdaksü.

Iba sentong nungjisa Khristan yimsü aser Islam yimsü tangatetbatem tsüngda tebendang balala aliba atema o lemtepa liasü.

Yimsü ajak nung tongti tasüngdangba pezü lir, aser itemji Tsüngrem ya shiba?, Meimchirtem ya shirnok? Alima kechiba yamai raksa? aser Alima nung teraksa ya koma yanglutsü? tasüngdangbatem lir, ta shia Bannister-i, Khristan yimsü ajanga Khrista ajanga meimchir menen alangzükba osang sangoktsür, ta ashi.

Paisa, "Khristan yimsü nung Tsüngrem ya tesendaktep yanglur ka, temeim aketba Tsüngrem aser ajak metetba Tsüngrem lir, ajisüaka Islam yimsü nung Tsüngrem tangatetba ya khenyongi balaka," ta ashi.

Paisa, "Islam yimsü nung nenok ya alartem dang. Tsüngremji kibur aser aser asenok alartem. Alima kechiba yamai raksa? ta süra Khristan yimsü ajangabo 'asenoki Tsüngrem anema apusoba agi' ta ashitsü," ta ashi.

"Iba atemaji telangzüba kechi lir? ta süra Islam yimsü ajanga, 'Ano ozüng kar agiang. Nenoki item ozüngtem

mebenshi, anungji ano ozüng kar agiang ta ashitsü. Khristan yimsüibo 'Asenoki teküzmzüker ka nüngdaker' ta ashitsü," ta Bannister-i ashi.

"Asenoki asen Muslim nunger medemertemji angatettsüla, parnoki kechi amangerar ibaji angatettsüla, iba sülen ang Khrista indang lemsateptsüla," ta pai ashi.

Bannister-i Khristanem dang Khrista temeim mapa agi sayutsü ajungshi.

"Muslim nunger kiyongertem nai yariang, iba sülen parnoki nü dang pelar ta ashidang nai aakmesena malitsüla. 'Ni na yariba ya ni Khristan asüba agi lir. Yisu Khrista ni atema asü aser na atema asü, ibayongji Khrista temeim sayua ni iba ya inyaker, ta ashitsüla," ta paisa metetdaksü.

Bannister-i, anüolen alir Khristanem aika sadoksadoka alir, ajisüaka alima tesem aika nung Khrista sülen anidakba agi reshikangshi ajangshirtem jenti lir, ta ashi.

Iba sentong nung jembidang Islam yimsü toktsür Khristan yimsü agizüksang John Ghanim-ia taküm kuli lemsatepa tayongzükba tulu agüja liasü.

Ghanim ya Yemen nung Muslim nunger kibong ka nung intet, ajisüaka tekümtet dak sendakba nung pai telangzüba melung süa telangzüba manguba agi Islam yimsü ashishi tenzüka liasü.

Islam yimsü amangertem atema temeshitiba tesem 'Mecca' semdangba mapang nungi pai Islam yimsü mamang tenzük.

Küm aika lir sülen Greece nung aliba refugee camp ka nung alidang pai Khristanem ajurua liasü. Bible studies aser Tesen Lai azüngba ajanga pai, atangji Yisu Khrista ya Tsüngrem chir aser Kümtetdakba, ta agizüka liasü.

Pa baptia Khristan akümba sülen par kibongi pa sendok aser mosque ajanga pa kinüngtsü den baladakja

liasü aser jala ana den-a teti asoshi pila.

"Ni atema ibaji kanga tasak liasü. Ajisüaka Mathi tapu 16 nung shia aliba ajanga ni ajungmeso. Iba Lai nung yamai shia lir, 'Nisung kati alima ajak alangzüker pa tanela samara kechi tajangzük ali?'. Kibuba, Na asoshi ni akaba ajak samaogo, ajisüaka ni atangji kodaki aotsü ta ni metet. Ni Nü meyong," ta metetdaksü.

Tang UK nung alisang Ghanim-ia Khristanem dang Muslim nungertem ya amokmeren ka ama mezüngshitsüla, saka mission wadang ka ama züngshitsüla, ta ashi.

Paisa Khristanem dang kecha metsübui Muslim nungertem den Khrista osang lemsateptsüla, kechiyong Muslim nungertemjia Tsüngremi Pa mesükba nung yanglu, aser parnokia tekümtet osang nüngdaker, ta ashi.

Paisa, "Shibai metet, Khrista osang tajung angashidaktsütsü atema Tsüngremi parnok (Muslim nungertem) Europe-i arudaktsü asütsüa akok. Khrista atema asenoki tasü aittsüla.

Asenok ket nung osangtajung lir. Asenok ket nung Yisu Khrista osangtajung lir," ta ashi.

Paisa, "Muslim nungertembo tasü tait. Parnok dang nungi asenok tasütaitba asütsü nüngdaker. Asenoki tamang tulu

akatsüla aser alia oa tashi angatsüla. Khrista temeim lemsateptsüla, kechiyong Tsüngremji temeim. Iba ya mission wadang ka lir ta ni amanger aser asenoki iba ya mission wadang ka ama züngshitsüla," ta ashi.

Ghanim-i, tasüngdangba balala langzütettsüsa Khristantemi renema alitsüla, talisa Tebu, Techir aser Tanela Temeshi, Khrista aser tekümtet dak sendakba tasüngdangbatem atema Khristantemi telangzüba agütsütettsüla, ta ashi.

Paisa, "Asenoki Laishiba junga meteta alitsüla. Asenoki Laishiba azüngtsüla. Khristantemi Tejen Lai nungi tenzüka Tasen Lai tashi azüngtsüla aser rasa-a shitettsüla. Asenoki komaka Laishiba nungi kuli agütsütetdir yamaji parnoki taliba angatettsü," ta ashi.

"Iba ya Laishiba meteta aliba indang dang masü saka chichiba Khrista dak tamang akaba indang lir. Yamaji süra parnoki nü dak Khrista angutsü aser parnokia Khrista dangi arutsü," ta paisa shisem.

Khristanem dang maneni sarasademtsü, Muslim nungertem den temba ayimtsü, Muslim nungertem yaritsü aser

Muslim nungertem den Khrista osangtajung lemsateptsü tayongzükba agüja iba webinar tembang.

ANO GO ABEN TSÜNGREM DEN

Nenok temang Tsüngrem tenla ki

Nenok dak aliba Tanela Temeshi, shiba nenoki Tsüngrem nungi agizük, nenok temang pa tenla ki ta nenoki memetet no ? 1 Korint 6: 19.

Alexander tulusang ya küm 16 nung Mesotomia nung yimsüsür aküm, küm 18 nung takoker general ka aküm, aser küm 20 nung chuba aküm, saka küm 33 majungdang chidiyungdir ka ama asü. Pai pa sasa dak takok mangu.

Temesepba tali ajemba ajanga azü tokshiba, balaluyuba, kibong raksaba, lendong aser rarabangsen tali adoker. Yi ajemba nung sen jenti endoker, mapa nung tamakok angur. Yamala mesukba timtem jentisa jenti lir.

Aika temulungjang, kibong aser taküm yi nungi mepilatetba ajanga tali tali dang raksar. Asen temangji Tanela Temeshi alidak ki lir. Tsüngremi asenok nem temang ya temeshi nung agütsü. Saka meimchirtemi iba temeshiji raksaba ajanga Pai Pa ajaso chir Yisu Khrista asüba aser shia aruba ajanga asenok tanaben alangzük. Aser iba alangzükbaji ajanga ibai Pa meyong aküm.

Asen temangji Tsüngrem meyong lir. Ibai aseni mulungba nung amshitsüba masü. Ibai Pai ne nem ketdangsütsü agütsüba lir. Temeshi Azü agi alizükba temang asenoki meraksatsüla. Tsüngrem nükdang ibai senti lir, aseni senti süa amshitsüla.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yin

(n) merang (iron, steel)

* Tanü putu nungbo yin amshia ki tulu -talang asür.

Yinjang

(n) prangpong nung enoker akahtsü yangluba yin tejang

* Tongpang rara nung sepaitem yinjang agima.

OLONG PAITEP # 7550

	1				2	3				
4			5						6	
						7				
	8									
	9			10			11			
						12			13	
14										
						15				

TIPIEN

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

-

(4)

-

(5)

-

(5)

-

(9)

-

(4)

-

(5)

-

(5)

-

(4)

LANGTSÜNGLEN

1. ____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. ____ kibur
13. Tebur tembar tsüngda jatepba

-

(4)

-

(6)

-

(5)

-

(5)

-

(6)

-

(5)

-

(4)

OLONG PAITEP # 7549 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER

FIFA World Cup 2026 nung nüngtugu football asayar Lionel Messi-i Argentina o Jordan asayadang goal ka yokba ajanga otsü tasen ka yangluogo. World Cup asaya tenetben atongtepa asayadang asayar kati asaya shia goal kaka yoktetbaji Messi lir aser June 28, 2026 nü pai iba otsü tasen yanglu.

Taküm FIFA World Cup nung Messi-i goal 6 tashi yokteta lir aser World Cup nung pa top scorer lir. Tang tashi nung Messi-i World Cup asaya balala nung goal 19 buba yokteta lir.

Mizoram SIR nung tenüing 46,000 tema agienogo

Aizawl, June 29, 2026

(Agencies): Mizoram nung Special Intensive Revision (SIR) tembangba sülen electoral roll nungi voters 46,000 agienogo.

Iba ya deaths, migration, duplicate enrolments aser untraceable voters ajanga liasü ta ketdangsürtemi ashi.

May 20, 2026 nungi state ajungalen revision exercise tenzüka liasü aser June 28, 2026 nü tembangogo ta Joint Chief Electoral Officer Ethel Rothangpuii-i ashi.

Special Intensive Revision (SIR) mapang tenüing 46,191 agienogo aser parnok rongnung

tasür teimba liasü. Tasür ajak agi 21,290 liasü ta Ethel Rothangpuii-isa ashi.

Nisung 13,992 tashi tangaleni aoba bushiteta tenüing agienogo aser voters 8,352 mebushitet ta laisa ashi.

Maneni, duplicate entries 2,245 jangjateta agienogo ta Joint CEO Ethel-isa metetdaksü.

SIR sülen Mizoram electoral rolls nung nisung ajak agi 8,28,877 lir aser iba ya 2025 electoral rolls nung 8.75 lakh voters nungi 94.72% lir.

Election Commission-i July 4, 2026 nü draft electoral rolls sayatsü. Iba sülen nisungtemi

July 5 nungi August 4 tashi claims & objections agütsütsü akok.

Mizo Zirlai Pawl (MZO)-i Chakma nunger teimba ser aliba tesemtem nung electoral rolls jungjunga jangjatsü takhangba agütsür.

Chakma nunger teimba ser aliba tesemtem nung voter 121% teimba kümogo aser official records nung yimtsüng tasen 97 akümba lir ta MZO-isa tai tongloktür.

Election Commission-i MZO ajanga benokba onüktem asadangdar ta Joint CEO Ethel Rothangpuii-i ashi.

Yimdaklirtem aser Meira Paibi nungeri UNLF-P camp belena meyok

Imphal, June 29, 2026

(Agencies): Yimdaklirtem den Meira Paibi temi Imphal East district aser Imphal West district nung Pambei-i aniba United National Liberation Front (UNLF-P) indang designated camps belenba noktangogo.

UNLF-P nung Military Affairs Committee ajanga tetuyuba agütsüba nung ajemdaker UNLF-P züngsemtemi designated camps toktsür aotsü tenzükdang nübertemi lungkak ait.

UNLF-P camps aliba ajanga

yimtsüngtem kümzüka ayur aser item teseptem agienba ajanga Imphal East nung yimtsüngtem timtem ajurutsü ta lungkak aitertemi ashi.

Nübertemi lungkak aitba sülen Chief Minister Yumnam Khemchand Singh-i village committees nungi teshimtet nübotem den ajurutepe senden amen.

Idangji Chief Minister Khemchand-i nübertem den asüngdangya mesüi designated camps mebelentsü nangzüko.

Pambei-i aniba UNLF teloki November 29, 2023 nung Centre den yimjung tenangzüktep nung sign sütep aser iba ajanga züngsemtem asoshi rehabilitation aser financial assistance lenmang lapoktsü.

Iba tenangzüktep kübok Centre-i UNLF züngsemtem nem monthly stipends agütsür. Manipur sorkari tawa tu Union Home Ministry dang May nungi October 2024 tashi second instalment (Rs 5.16 crore) agütsütsü shidi zülüogo.

Shillong 10K Run 2026 nung nisung noklang aikati shilem agi

Shillong, June 29, 2026

(Agencies): June 27, 2026 nü 7th Shillong 10K Run 2026 nung Hasebinson Marwein-i men's champion aser Marqueenless Ramsiej-i women's champion nguogo.

International Olympic Day tenüing nung iba sentong ya Meghalaya State Olympic

Association (MSOA) ajanga ayongzüka agi aser nisung noklang aikati shilem agiogo.

Men's race nung Wanbok L Mawphlang-i tanabuba aser Junom Phawa-i tasembuba jenjang takoktem angu. Maneni, women's race nung Jidalin Tympuin-i tanabuba aser Maryqueen Pale-i tasembuba

jenjangtem angu.

Iba race ya Indian long-distance runner Binningstar Lyngkhai aser international karateka Damang Syngkon nati tenzüka liasü.

Iba sentong nung Directorate of Sports and Youth Affairs, East Khasi Hills district administration, Police Department aser volunteers-i nungita yari.



Mizoram nung tesüiba küm pungu tsüngda alima lendongtsüdong balala aser waratem adokba ajanga Rs 1,291 crore tema akoksaogo ta Post Disaster Needs Assessment (PDNA) report ka nung metetdaksüogo. Mizoram Chief Minister Lalduhoma menden ser State Disaster Management Authority (SDMA) senden ka nung PDNA report lemsatapa liasü. Mizoram nung African Swine Fever (ASF) aser koya wara agi Rs 656.76 samatsü aser Rs 634.35 crore shi akoksa. Kasa mapang Cyclone Remal aser anentsühtem ajanga takoksa bentsür aru ta PDNA report nungsa shia lir.

GOVERNMENT OF NAGALAND**DIRECTORATE OF ANIMAL HUSBANDRY & VETERINARY SERVICES****NAGALAND :: KOHIMA****NO.VET/EXTN/VFA/2026-27/****/Dated Kma, the June' 2026****EXAM NOTIFICATION**

No.VET/EXTN/VFA/2026-27/ Examination for 30th Batch, Veterinary Field Assistant Written Entrance test will be held on 28th July 2026 at St. Francis De Sales, Hr. Sec. School, Medziphema from 11.00 AM - 2.00 PM. Eligible candidates who have applied for the examination are to collect the Admit Card from the Office of the Principal, VFATI, Medziphema, during the Office working hours on 23rd, 24th & 27th July 2026.

Sd/-**(DR.KUOKEHEBI GWIRIE)****Director****A.H. & Veterinary Services ,Nagaland, Kohima**



Kabul, June 29 : Tayimtsü amshia Afghanistan kübok Paktia Province nung amakba sülen June 29, 2026 nü nüburtemi raksar aliba ki semdangba noksa nung angur. Pakistan-i tayimtsü amshia Afghanistan anüdoklen amakba nung nisung 36 asü aser 163 yiru, ta Afghan sorkar ketdangsür temi ashi. Deobar aonung Pakistan den arütsüa aliba Paktia, Paktika aser Kunar province tem nung amak ta ketdangsüri ashi.

Pakistan security force-i Afghan arrtsü nung telungpur 29 tepsetogo

Kabul, Aami/June 29 (Agencies): Pakistan security force temi anüng aser ali ajanga Pakistan-Afghanistan arrtsü nung tesem balala meita aoba mapang telungpur 29 tepsetogo, ta ketdangsürtemi metetdaksü. Telungpurtemi linük kübok tesem balala amakba atema telangzüba agüja iba meita aoba sentong ya benoka inyaka liasü, ta Pakistan Information Minister Attaullah Tarar-i social media nung sangdong ka ajanga metetdaksü.

"Paktia, Paktika aser Kunar nung target asem raksatsüogo," ta Tarar-i X ajanga metetdaksü. Tesem aseprongla ya Afghanistan nung anütoklen province tem lir.

Afghan Taliban sorkar deputy otongdar, Hamdullah Fitrat-i ashiba agi, Pakistan-i item tesemtem amakba mapang civilian 36 tepset aser nisung 163 yirutsüogo.

Pakistan nung kümtem tsüngda telungpurtemi police aser security force tem amakba ajangashia arudar.

Item tesemtem amakba ya

ketdangsürtemi Pakistan Taliban, shirnok dang TTP ta ajar parnok aser parnok den sendaktepa aliba teloktem dak tai tonglokja arudar.

Iba telok nungi züngsemtemi Karachi nung paramilitary Rangers indang regional headquarter maka sepai asem tepsetba sülen anogo ka lir iba ya atalokogo.

Kasa mapang nung sepaitemi iba tesem amaker asem tepset aser ka apu. Military-i ashiba agi, pua alisang ya Afghanistan nunger ta jangjaogo.

Pakistan Taliban nungi jakzükbä Jamaat-ul-Ahrar teloki Honibar aonung Karachi nung iba tesem amakba ya nangzükogo.

Tarar-i ashiba agi, Pakistan-i Afghan arrtsü nung Pakistan Taliban pur jenoka aliba tesemtem makogo.

Pakistan Taliban ya Afghan Taliban dang nungi telok balaka lir, saka telok ana ya sendaktepa lir. Pakistan-i tang item tesemtem meita aoba ajanga Islamabad aser Kabul

na tesendaktep mejungi aliba tamajungba kümshidaksütsü ta bilemer.

Pakistan military-i Afghanistan nung telungpurtem jenoka aliba tesemtem amakba sülen hopta asem majung tsüngda tang ano arrtsü adener meita aoba sentong ka benoka inyakogo.

February ita nungi linük ana tsüngda mapangshia raratepba arudar aser iba mapang nisung noklang aika tepsetogo.

Linük balala tiyongtsüi ia yimjung atema aiben sensaksema arudar, saka tang tashi teti atema ceasefire ka mebenokteti arudar.

Taoba küm nungi Pakistan-i arrtsü adener Afghanistan kübok tesem balala nung Pakistan Taliban aser tanga telungpur teloktem maka arudar.

Telungpurtem shirnoki Pakistan kübok tesem balala makar arudar, parnok nem tejenokdak agütsüba atema Pakistan-i Afghanistan aija arudar, koba Kabul-i magizüker.

Venezuela nung takum alir ngutettsü timla makai akümer

Caracas, Aami/June 29 (Agencies): Venezuela menoknok lendong nung asür 1,450 jungogo aser teküzmükertemi taküm alirtem takok tashi kümzüktsü merangdar, saka timla sama odar.

National Assembly tir Jorge Rodriguez-i Deobarnü sangdong ka ajanga Bodhbarnü La Guaira temeket nung menoknok tesashi ana anokba sülen iba lendong nung nisung 3,150 yirur lir ta metetdakja liasü.

Paisa, nisung 12,721 talidak makai kümogo aser ki 774 chirepogo, ta ashi.

Kasa mapang nung tang tashi nung nisung 50,000 tera majung samar bushidar, aser Venezuela nunger teküzmük

30,000 shi aser bendanger teküzmükter mongintem 2,700 shi inyaksangshidar, ta paisa metetdaksü.

Lendong ataloker mapang talang ka süier asünung nüburtem taküm lia kümzüktsü timla kangbo makai akümer, saka Deobarnüa nisung kar taküm lia kümzükba sülen maneni timla terabo agütsüogo.

"Tanü onoki taküm alir kar kümzükogo, anungji operation maneni benoka inyaksü. Onok timla mesamai lir," ta interim tir Delcy Rodriguez-i ashi.

Kümzükertem rongnung arishi küm 60 tain tetsür ka densema liasü. La ki techirep ka nung ghonda 86 sabanger liasü.

X nung sangdong ka ajanga

El Salvador tir Nayib Bukele-i ashiba agi, par linük aser Peru nungi teküzmükertemi iba tetsürla kümzüktsü atema ghonda 11 inyaka liasü.

Tir Rodriguez-i ashiba agi, hopta tatemi nisung 33 kümzükogo. Laisa, school tem ano hopta ka atema shibanga atatsü aser electricity supply shilem 75 bo yanglushiogo, ta shisem.

Washington-i teküzmükertem yokogo aser USD million 150 tenla agütsütsü asoshi tenangzükba agütsüogo.

European Union foreign policy tekolakba Kaja Kallas-i Deobarnü ashiba agi, parnoki jongdak teyari agütsütsü atema euro million 5 bendentetogo.

US-Iran jembishinüba nung odongtar temi lenmang bushir

Dubai, Aami/June 29 (Agencies): Iran aser US technical team tem interim peace deal mapa kuma inyaksü nunglokja alirtem anogo ishika tsüngta Doha nung ajuruteptsü imlar, ta Hombarnü osang kar ajanga ashi. Ibai hopta tatemlen tayang kepzüktepa kati ka dak amakba ajanga tezüngzüktep raksatsü ama tensa kati aiba sülen iba osang ya arur.

Tensa tamajungba mekumdaksütsü mechi odongtar temi communications channels amenokogo aser technical jembishinü maneni akatsü, ta iba jembishinü indang meteta alirtemi ashi. Ajisüaka Iran ketdangsür kati technical senden ya ano tejangja masü ta ashir.

Ita pezü rara tembangtsü nükjidong nung US aser Iran tsüngta 14-point memorandum of understanding ka June 17 nü zülutepa liasü, aser iba tezüngzüktep kübok linük anaprongi tsükchitep anentsü aser alima nung totzü aser liquefied natural gas shilem 20 shi abenba Strait of Hormuz tanaben lapoktsü mulungtep.

Iba tongtipang tzü lenmang shibangba ajanga totzü jenjang barrel ka nung sen \$100 dak tema kumdaksü aser alima nung osettsüset jenjang tali akum.

Iba tezüngzüktep yagi Iran indang nuclear program ama ken o tamajung tem anogo 60 agia jembitsü lenmang tem lapoktsü, saka linük anaprongi züngzüktepba olen balala ashir.

Hombarnü Iran Tir Masoud Pezeshkian-i ashiba agi, tezüngzüktep agiba sülen Qatar nung par assets sen \$12 billion soita aliba nungi sen \$6 billion salar Iran nem agütsütsü, ta Iranian state media ajanga ashi.

Tang tesüsa züngzüktepba ajanga Iran indang totzü aser petrochemical sectors nung tenokdangba agüja aliba agienogo aser ibaji Iran nüburtem asoshi takok tulu lir, ta pai ashi.

US ketdangsür kati Deobarnü Reuters dang linük ana yagi tsükchitep anentsü mulungtepogo ta shia liasü.

"MoU nung shia aliba ajunga nung technical jembishinü manentsü. Tang asoshi linük anaprongi rara anentsü aser rong tem sadem-sadema senzütsü," ta ketdangsüri ashi.

Hombarnü Iran indang Deputy Foreign Minister Kazem Gharibabadi-i ashiba agi, technical working group senden tem tan hopta alitsü sentong mali aser Qatar nung jembishinü akatsü mejangja, ta Iran indang Tasnim news agency ajanga ashi.

Jembishinü tangi meyipba sülen anogo ishika makteptsü,

kechiaser Brehostibarnü Iranian projectile ka Strait of Hormuz nung khu abenba rong ka nung khaloktsü aser US aser Iran nati interim ceasefire raksar ta kati ka dak tai tongloktsütepa liasü.

US Tir Donald Trump-i tesüsa Iran amokmerener mapang tatsüka lir Deobarnep Iran-i Kuwait aser Bahrain nung US mitkar aliba tesemtem nung missiles aser drones khalokja liasü.

"Tebilemdangtsü makaba mapang ka arutsü akok, aser idangji asenoki mitkar tsütsü takok ngua tenzükba mapa tembangdaksütsüsa akumtsü," ta Trump-i social media nung ashi.

"Ibaji atalokra, Islamic Republic of Iran ya malitsü!" ta pai ashi.

Trump-i iba o post sütsür ghonda ka shi lir Kuwait indang army temi par air defences ajanga missile aser drone amshia amakba nung langzür ta ashi aser Bahrain-ia siren ola agütsür ta shia liasü.

Iran indang Islamic Revolutionary Guard Corps ajanga sangdong ka nung par indang navy aser air forces temi Kuwait aser Bahrain nung US military sites nung tenük yoker missile aser drone operations tenzükogo ta ashi.

US-i amakba ajanga ceasefire ozüng raksa aser iba yongji onoki yimjung inyakyim ajunga anentsü aser region nung America nunger alidak molumi ama ajangshitsü ta shia liasü, ta Guards ajanga ashi.

Ghonda ishika lir Bahrain nung siren ola tanaben agütsü, kong Iran nungeri amakba ajanga nisung aliba ki ka raksatsü, ta ketdangsür temi ashi. Bahrain-i U.N. Security Council dang Iran aitsütsü atema ajungben senden ka jazüktsü ajungshia liasü.

Kuwait army temi ballistic missiles ana khazüka yok aser ki o jen raksaba mesüra asü-amaba mali ta ashi.

Kasa mapang Lebanon indang parliament Speaker Nabih Berri-i US tetsüngtai yia Lebanon aser Israel tsüngta tezüngzüktep yangluba aitsü.

Berri-i iba tezüngzüktep yagi Lebanon nung telemsa adoktsü aser iba ya mapa kuma meinyaksü, ta Hombarnü ashi.

Iran bhukuma Hezbollah-i rara tetenzüklen Israel nung amakba sülen Lebanon nung rara ya tenzük. Israel-i langzüba ajanga Lebanon nungi nisung aika pei ki yutsür tesem balala nung jenshi aser nisung 4,000 dak tema asü.

Tehran-i rara tembangtsü aser Lebanon south len nungi Israel sepaitem ainshitsü ya US den tezüngzüktep yangluba nung keta lir ta ashir.

World Cup: Canada-i South Africa koka round of 16 tongtetogo



Canada team nungi Stephen Eustaquio-i goal agütsür pelatepba noksa nung angur.

Aami/June 29, 2026

(Agencies): FIFA World Cup round of 32 mezügbuba asaya nung Canada-i goal 1-0 agi South Africa koka parnoki tang mezügbuba round of 16 tongtetogo. Asaya nung goal ka ya Stephen Eustaquio-i idakja liasü.

Deobarnü asaya nung Eustaquio-i South Africa penalty box kümbang nung ball ka agizüka goalkeeper Ronwen Williams adena metsüokja iba asayamung nung mezügbuba knockout-round asaya tembanga liasü.

Asaya nung South Africa pur mapang apuloktsür asayatsü aser penalty dena asayatsü atema renemer aliba ama reprangtetogo, kechiyong parnok maritepi dang asaya liasü. Goal idaktsüba sülen parnoki goal idaktsütsü atema aritepa merangdang saka magütsüteti asaya tembang.

Canada quarterfinals nung jenjang ka atema Netherlands mesüra Morocco den July 4 nü

Houston nung asayatsü.

Asaya mezügbuba shilem nung goal idaktsütsü atema telok anapronglai maongka kangabo monguteti asaya liasü. Team anaprongla ya tang mezügbuba knockout round nung asayarba liasü.

Canada asoshi mongka tajungtibaji asaya mezügbuba shilem tembangtsü lia angur, saka Moise Bombito-i ball tongoktsüba ball ya line nung Aubrey Modiba-i nokdang aser Tajon Buchanan-i goal anasa nungi ball metsüoktsüba Williams teku nung tsükdak.

Iba sülen mapang tatsüla lir Richie Laryea box telung nung alang aser Canada-i penalty agütsütsü akhang, saka VAR asadanga sülen penalty magütsü.

Asaya tanabuba shilem nunga Canada-i goal idaktsütsü atema kanga nongshia asaya saka magütsütetba atema tezüdang tenzüka liasü, saka South Africa team bo kecha maritepi dang asaya liasü.

Asaya tanabuba shilem nung hydration break atongtsü lia Canada atema Tani Oluwaseyi-i metsüba ball ka keeper dak tsükdak aser meyiper adokba ball ya Jonathan David-i tongoktsü, saka Mbekezeli Mbokazi-i kanga junga kümzüka liasü.

Eustaquio-i iba takok ya Canada nunger ajak nem bendanga agütsüogo.

"Goal kanga tajung liasü ta bilemer. Ni ball metsüba mapang kü den külemi nisung aijaki ball metsü ama bilem. Ball net telungi aiba mapang nisung ajaki tashi tilala agütsüogo.

"Group stage ajangtetba sülen tamang kateta aküm. Iba asaya akokba ya tamang katetba dak tuluka keta lir. Onok taruba asaya Netherlands mesüra Morocco den asayatsü. Kechiang ataloktsü memetet. Onoki tang asayaba amadang meranga asayara asaya akoktsü akok," ta Eustaquio-i ashi.

US Open: Kidambi tanabuba jenjang nung tembangogo

Aami/June 29, 2026

(Agencies): India nunger badminton asayar Kidambi Srikanth-i US Open Super 300 badminton asayamung final nung Chinese Taipei nunger asayar Su Li-yang makokba sülen tanabuba jenjang nung tembangogo.

Arishi küm 33 tain taoba mapang world No. 1 asayar yagi mezügbuba game mekoki liaka kanga merangar asayar tanabuba game akok, saka tasembuba game mekoki 15-21, 21-16, 9-21 agi asaya mekoki liasü. Tena tsüngda ghond ka dak tali asaya liasü.

Taküm mezügbuba final asaya nung Srikanth-i asaya kanga junga tenzüka saka rally ka asayaba mapang pa indang racquet net adena oa aibenbo

memenaba aibelen ka menaba sülen junga masayateti aküm.

Mezügbuba game nung pai kanga meranga asayar asaya tom tashi nung point kasasa aküm, saka break sülen Su-i kanga kara asayaba den shot tem kanga sangra asayaba sülen mezügbuba game akok.

Tanabuba game ya mezügbuba dang nungi tetoktepba asaya, aser asayar anapronglai kati ka nem asaya mamokbangdaksüi asaya liasü. Srikanth-i pa tajangshiba tem sayua net nung kanga junga asaya aser game tom nung pai asaya züoka liasü.

Game tatemtsü lia Su-i pa kanga nongshia asaya saka India nunger asayar yagi masetshi-i asaya-a tanabuba game akok.

Ajisüaka decider asaya yabo Su-i amokbanger asaya liasü. Asaya tetenzük nungi pai attack süa asaya aser Srikanth nem point angutsü atema kecha maongka magütsü. Iba sülen pa point aika agi timba aküm.

Srikanth-ia shot tajung kar asaya-a point tem angur saka pai aibelen aika mena liasü. Asaya tom nung pai tola melentsü atema asüngdanga chair umpire-i memelaba ajanga pa ano tezüdanga liasü.

Su-i maneni asaya amokbanger asaya aser championship points 12 ngua liasü. Srikanth-i ka bo kümzüktet saka iba sülen Su-i asaya koka pa indang career nung mezügbuba BWF World Tour title ka benogo.

Ben Stokes international cricket asaya nungi anisüngzüker

Aami/June 29, 2026

(Agencies): England captain Ben Stokes-i New Zealand den tasembuba Test asaya tom nung pa international cricket asaya nungi anisüngzüksü atema telemtetba agiba sangdongogo.

"Ni nenok captain ama joko anogo ana dang asayatsü aser England tenüng nungia joko anogo ana dang asayatsü," ta Stokes-i Trent Bridge nung Test tasembuba anogo pezübuba tenzüksü lia Deobarnü dressing room nung England teammate tem dang ashi.

Iba osang ya tea break atongtsü minute 15 lia sangdonga liasü. Iba sülen mapang tatsüka dang lir Stokes-i wicket ka agi aser session tembanger tuguba mapang pa nem standing ovation ka agüja liasü.

Arishi küm 35 tain Stokes ya alima nung cricket asayar tajungtiba rongnung ka lir aser pa England tenüng nungi küm 15 asayaogo. Pa asoshi takok tajungtibaji Lord's nung 2019 küm New Zealand den 50-over World Cup final asayaba mapang pai team takok dangi aniba ya asütsü.

Maneni 2022 küm England-i T20 World Cup akokba nunga pa kanga tongtiban asayar ka liasü, aser kasa küm pa Test captain aküm.

Teammate Gus Atkinson den club ka nung mangatetep adokba ajanga bushisüngdanga mapang Test tanabuba nung masayadaksüba sülen mepetmesü nung aliba mapang Stokes-i pa international cricket asaya nungi anisüngzüksü atema telemtetba agiogo.

Asayar ana ya London nightclub ka nung aliba mapang England team security official ka dak English club Saracens nungi rugby asayar kati züka liasü.

England and Wales Cricket Board (ECB)-i inyakyim nung aibelenba atema Stokes aser Atkinson na tanabuba Test atema meshim aser tezüluba nung tekümdangtsü metetdakja liasü. Ken o bushisüngdanga sülen Cricket Regulator body-i, tenati inyakyim nung aibelenba atema aitsütsü asoshi kuli peria mali ta ashi.

ECB mendenbuba Richard Thompson-i ashiba agi, Stokes ya England nunger cricket asayatem rongnungi tajungtiba ka ta ashi.

"Pai pressure nung kanga junga asayatetba aser nüngdakba mapang nung kanga junga asayatetba ajanga ni densema fan million aika nem tajangshiba tajung agütsüogo, koba teti bilemtetsü," ta Thompson-i ashi.

Nagal-i ATP Challenger Title ka benogo

Aami/June 29, 2026

(Agencies): India nunger nungtugu asayar Sumit Nagal-i mapang talangka ataba sülen Honibarnü Targu Mures, Romania nung Intaro Open clay-court asayamung koka ATP Challenger title ka benogo.

Final nung pai France nunger qualifier Felix Balshaw 6-3, 7-5 agi koka liasü.

Iba asayamung akokba ya Nagal asoshi küm ana tsüngda tang mezügbuba ATP Challenger title ka abenba asütsü. Pai tatemsa 2024 küm June ita Germany nung Heilbronn Challenger koka liasü.

Arishi küm 28 tain asayar yagi iba asayamung akokba densema ATP Challenger kija asaya tenet kokogo, aser clay nung asayamung pongububa akokba asütsü. Iba ajanga pai clay court nung kanga junga asayaba sayur.

Iba asayamung akokba sülen Nagal-i ATP ranking points 75 nguogo aser pai rankings sayaba mapang pa

world No. 219 jenjangi atutsü imlar. Kasa mapang nung pai senpet euro 15,510 agizükogo.

Mezügbuba set nung Nagal-i baseline nung kanga junga asaya kangabo timtem meli-i dang asaya kokatok, ajisüaka tanabuba asaya nungbo Balshaw-ia pa den kasa toktepa asaya, saka pai süngjemshir asaya azüoka asayateta straight-sets nung takok nguogo.

Iba takok ajanga Nagal kanga ajungkettsü, shiba tang asaya aliba season nung mapang talangka ka Challenger circuit nung dang asaya-a pa indang ranking yanglushia upper tier-i meyipa arua asayatsü asoshi inyakdar.

Romania nung takok ngua masaya tsüngda Nagal taküm Challenger asayamung 13 nung asayaogo, saka ka nung danga tanabuba round adena asayar maliasü. Pai tatemsa tajungtiba asayabaji Moldova nung Chisinau Challenger nung quarterfinal tonga asayaba ya asütsü.

BILEMDANGANG

"Nai kechi maginer aji tangar daka teinyak."